

Häfe Zunft Brönznau Schnitzelbänke 1998

**Aidu aidu aidu schöner,
aidu schöner Schnitzelbank.**

So einiges het i dem Johr z´Rede gäh,
was das esch gsi, wärde der jetz grad vernäh.
Grossbanke tüend sech zämeschliesse,
z´Luxor tüend Fanatiker Lüüt erschiessse.
Au d´Fuessbau-Nati het eim z´danke gäh,
ond Schnitzubänk gets ou öppe zwöi mou zäh.
So händ mer i Wort ond Böud, so mängs Malheur feschtghaute,
drum luegemer jetzt i dem Buech was esch passiert im Johr im Aute.

**Esch das ned es Geographie-Genie?
Nei, das esch keis Geographie-Genie!**

D´Haas Susanne esch i eusne Ouge,
es Geographie-Genie, s´esch chum zom gloube.
So esch si s´letscht Johr of Näbestrosse,
vom Floghafe Klote öbere Hirzel of Emme abe g´stosse.
Vo det us fahrt si denn gägem Gotthard ue,
doch nome verfare, wär no ned gnue.
I de Gotthard-Raschtstätte muess si met emene Kolleg telefoniere,
om z´froge, we si sech weder söu hei schoffiere.
Met Höuf vo dem Kolleg goht´s denn ohni z´flueche,
sösch wörd si Brettnou nämlech höt no sueche.

**Mues die ned lehre fotografiere?
Mou die mues lehre fotografiere!**

S´Romi im Pöschtli gsehsch i de Chuchi hantiere,
de glii tuet es Hochset imarschiere.
D´Tisch send deckt, es esch e wahri Pracht,
ond was us de Chuchi chont, esch super gmacht.
S´Ässe ond Gescht, das gsehsch s´Romy fotografiere,
so tuet äs de haub Obe dur d´Linse stiere.
Doch wo s´Romi de Film zom Entwickle wot usenäh,
hets ehm de fascht öppis gäh.
Romi vo dem cha der jede Fotograf es Liedli senge,
das ohni Film oms verrecke keini Böudli glenge.

**Esch das ned e Poutergeischt?
Mou das esch e Poutergeischt!**

De Iff wo duet bem Fuchs Hänsu huuse,
nemmt einisch e Kolleg met hei zom pfluuse.
Wenn eine chli z'vöu intus het,
chaner bem Ändu ofem Eschtereich is Bett.
Ou si Kolleg scheckt är det ue,
ond schlot vo onde d'Klapptöre zue.
Gäge Morge chaner de nömmen witer döse,
är sött drom unbedengt go Wasser löse.
Dä stopfet ond powderet, doch de Iff ghört nüt,
deför näbe dra sini Husmeischters-Lüt.
Scho gseht me de Hänsu om s'Hus ome stopfe,
är suecht de Grund vo dem ominöse chlopfe.
Wöu är ned use fendt, was das söu bedüte,
tuet är haut de Polizei alüte.
Die send de ned of d'Bire gheit,
ond hend dä Borscht scho gli us siner messleche Lag befreit.
Ond jetzt loset er Giele: Wenn der weder so vöu tüend obe ine schänke,
tüend denn ou as abloh danke.

**Tuet dä ned em trochne fische?
Mou dä tuet em trochne fische!**

Fragst de Brutus was hätsch ofe Geburi gärn för nes Gschänk,
so tönt's, he, e Fescherruete dank.
D'Cecile loht sech's öppis choschte,
ond tuet ehm so ne Wörmlibader poschte.
Scho gsehsch de Brutus of de Baukon usehetze,
om det di Leine samt Zapfe im Züg omezschatze.
S'Warte of ne Bess cha sech de Brutus spare,
bekanntlech muesch för das a Sämpacher-See oder a d'Aare.

**Tüend die do metenand rede?
Nei, die do tüend ned metenand rede!**

Es Indianerzelt esch vör d'Chend e Hit, das esch ke Log,
dänkt de Segrischt Willu bem Studium vom Acherma-Katalog.
Grad werd e sone Wigwam bschtöut,
ond zwar för de Thömeli, dä chlini Höud.
Noch dere B'schtouig send öber zwe Woche, ond zwöi Telefon verbi,
ond de Segrischt Willu esch emmer noni Bsetzer vo sonere Blache gsi.
Wo är de d'Trulla öber si Chouf informiert,
seit se, erscht geschter hani das Päckli s'zwöite Mou retourniert.

**Het dä ned si Wage zämedröckt?
Mou dä het si Wage zämedröckt!**

Dr Gouk vom Schürberg obe,
het e Bsuech bim Schär Fritz wöue woge.
Mit em Auto, oni öppis böses z'danke,
duet är vo de Houptstross zom Fridu zueränke.
Ond jetzt, wo är de Wage wot ofe Parkplatz manöveriere,
tuet s'Schlimmschte no passiere.
Dr Gommischtefu esch onderem Gaspedau bliebe hange,
drom fahrt dr Gouk anstatt ofe Parkplatz, i d'Telefonstange.
De Ford Fiesta esch nömmen bruchbar gsi,
ond är het ne tuschet gägene VW-GTI.

**Esch das ned Atom ond Bombe secher?
Mou das esch Atom ond Bombe secher!**

De Handörgelclub ladt of d'Fennere zor GV i,
jo, do dra wär no nüt Speziells gsi.
Aber de Hämpu macht die Versamlig de cheibe interessant,
am HC esch de Sitzigsrum nämli no unbekannt.
Im Belegisplan vo Beiz ond Saal,
send nämlech itreit anderi Vereine, es esch fatal.
Wie för ne Kriegsmobilmachig tuet är jetzt organisiere,
ond d'Handörgeler i Luftschutz-Chäller abe spediere.
Drom Hämpu, do hesch nüt überleit,
oder esch das öpe die nöii Boowaldgastlichkeit.

**Esch das ned e vergässleche Maa?
Mou das esch e vergässleche Maa!**

De Wadi tuet amene Obe of d'Gülle ue rase,
är wott no gschnäu för sini Chüe go grase.
D'Männerriege het im Hüttli obe es Fescht,
ond scho baud ghört de Wadi ou zo de Gescht.
S'get Bier zom suffe, ond Speck zom ässe,
de Rankbur het s'Grase scho längscht vergässe.
Ohni Gras för d'Chue,
beget är sech gäge Morge ie zor Rueh.
Am andere Tag gets de e cheibe Schreck,
wo d'Helen froggt: Wo hesch de Check.
Jetzt hani wäge dem suffe ond frässe,
d'Möuchzahlig ou no vergässe.

**Esch das ned e Monete-Drucker?
Mou das esch en Monete-Drucker!**

De Kuenz Otti got go Böhse entsorge,
ond die muess me jo bekanntlech dor ne Press abe worge.
Vouer Elan schöttet är e Chorb vou obe ie,
ond scho gsehsch ne schneidig am Presshebu zie.
Das goht cheibe guet, das louft jo we g'schmieret,
aber nochhär het de Otti de ganz verdozt i si Chorb ine g'stieret.
Denn längt är i Hosesack, luegt em Chorb nomou noh;
Gopferdecku, jetz hani mi Gäudsecku ou no döre gloh.
Bis är de wede gha het sis Gäut,
chonnt de Männerchörler scho chli of d'Wäut.
Ond d'Zönftler hend das Messgscheck de haut ou vernoh,
drom esch osser em Gäudsecku, ou de Otti chli flach use cho.

**Hed dä ned en rüdige Fang?
Mou dä hed en rüdige Fang!**

Use rüehre, ine zie,
Feschli drab ond wede ie.
Met dem Motto send's de a Sempisee,
de Segrischt, de Penalty ond de Kunz Rene.
Doch die Rächnig esch de ned ganz ufgange,
de Kunze het nämlech öppis ganz anders gfange.
Es esch gross, wiss' ond het e länge Hals derzue,
för ne Mouzyt hesch de förig gnue.
Vou wärde jetzt säge es seig de Moldovan,
debi esch es gsi ganz eifach e Schwan.

**Het dä do ned Lehrgäld zahlt?
Mou dä do het Lehrgäld zahlt!**

E Buure-Gant, so stoht's i de Grüene,
tüent's em Jura hende dorefüere.
Näbscht Fahrhab ond e chli Veh,
chasch ou de Bolliger Mätu, dä Agronom gseh.
Bem biete vomene Kipper, do chonter i d'Euphorie,
Zum o Zum, ond scho esch är de nöii Bsetzer gsi.
Am Telifon tuet är am Vater de no brechte,
är söu doch zom zahle es paar Tuusiger rechte.
Doch de Mätu het de fascht de Hörer g'frässe,
wöu de Vater am Kipper het kei Inträsse.
Zom zahle esch em de halt no öppis blebe,
Prisdifferänz zom Nöchschte, nor wöu är het e chli öbertrebe.

**Tuet die ned Blueme-Dönger teschte?
Mou die tuet Blueme-Dönger teschte!**

S'Lienert Joli tuet bem Hlobil sini Arbet verrechte,
det passiere ehre ou öppe so Gschechte.
Es tuet ehre e Frou es Glas ond Blueme abgäh,
ond sofort tuet s'Joli em Labor e Urintescht vornäh.
Be de Uswärtig meint si de, si seig bsoffe,
esch doch be dere guete Frou, anstatt Bluet nor Zocker dor d'Odere gloffe.
I das Glas ie hätt sie g'schiter d'Blueme gschteckt,
de wär ehre de Urintescht ned abvereckt.

**Tüend die do ned Wärczüg sueche?
Mou die do tüend Wärczüg sueche!**

E Beere uswächsle anere Strosselatärne,
do chömme de Leu Köbu ond de EW-Chef Grueber emmer is Schwärme.
So nänd's de Jeep ond d'Leitere voller Freud,
ond fahre of Liebige, öber d'Rossweid.
I de nöchi vom Jordi schtöues de d'Leitere a ne Latärnemaschte,
ond scho g'sehsch de Leu Köbu Seigu om Seigu höher taschte.
Wo de Köbu dobe esch, g'sehsch ne de ordeli schtuune,
e Schruubezieher sött är ha ond es Zangli zom use schruube.
Ou em Auto tüends vergäbe ehres Wärczüg sueche,
s'Innerschte nach osse dreie ond debi ou no flueche.
Zwe Stromer ohne Wärczüg, das esch doch e Hohn,
ond mer zahle dene doch ou no de Lohn.
Gott sei Dank hett ne de Jordi Käru met Wärczüg us g'houfe,
die wäre schösch no zwe Stond om ehres Auto gloufe.

**Macht dä ned e Büroschlof?
Mou dä macht e Büroschlof!**

E Honkeler Drockmaschine bekannt i wite Chreise,
föer das mues de Glur Röbu bes of Schwede reise.
Einisch go, i chome jo gli weder hei,
d'Brigitt ond d'Chend lot de Röbu ned gärn elei.
Das Gschäft em höche Norde esch de gli akrediert,
drom esch är e Tag fröhner weder ad Wegere disloziert.
Det lit d'Brigitt scho em tüffe Schlof, me cha si ned wecke,
ond de Schlössu het si ou no lo stecke.
Ou s'Telefon, es tuet nor lüte,
a Röbus Gattin cha das ou nüt bedüte.
Das Reisli nemmt de haut es komischs Änd,
nor wöu sech zwöi ned verstande händ.
Z'Wigge äne, e Bürolescht mues es kenne,
het d'Honkeler AG Büro, i dene chansch ou z'Nacht go penne.

**Esch das ned erotisch gsi?
Mou das esch erotisch gsi!**

I de Adväntszit Tör ond Fenschter schmöcke,
do tuet ou d'Fuchs Silvia kei Ufwand förchte.
Am Hänsu sis Bürofenschter werd denn so verziert,
dass es anderi Lüüt sogar erotisch iretiert.
Die Grüene ond rote Lämpli, die lade jo richtig i,
ond wär's ned weiss, för dä chönnt's jo e Salon si.
D'Silvia het denn die Lämpli bletzartig wede abmontiert,
wöu die Erschte heige sech scho nach de Prise informiert.

**Esch das ned en Volltreffer gsi?
Mou das esch en Volltreffer gsi!**

Hornusse esch ned e sone eifachi Sach
Das weiss de Schär Mättu, är esch jo vom Fach.
Henderem Hus tuet är denn trainiere,
de 4-Beiner wot em derbi assistiere.
Nüt esch, seit de Mättu, gang jetzt wede hei,
abmässe ond schlo, das chani elei.
Nüd lose tuet dä Hund ond das het e Foug,
das Träf breicht ne de grad am Aug.
Aus 1-Äuger lauft är jetzt ome dä chlini Schöum,
ond propagiert vörne Hornusser-Hundehöum.

**Esch das ned es gfräsigs Tierli?
Mou das esch es gfräsigs Tierli!**

De Lienert Willu vom Chätzemoos,
het of de Arbet ond Deheime emmer öppis los.
So duet är s' Mettagässe vom Däschu deheime konsumiere,
de chan är zom Hof luege ond zo sine Tiere.
Doch einisch nach em ufesche vo Gmües, Vorässe ond Händöpfupappe,
muess är wäg em Telefon i Gang use schlarpe.
Nome öppe drei Minute heig das Gspröch denne duuret,
doch i dere Zyt het sis Höndli s' ganze Mettagässe verrumet.

**Esch das ned de letscht Schifahrer?
Mou das esch de letscht Schifahrer!**

Go schifahre esch de Leueberger Petu met Ahang,
of Andermatt ane sone rüdige Hang.
Met em Fürebe-Bähnli no einisch ue,
de Letscht wet är si, erscht de het är gnue.
Z' Oberscht acho, wot är abem Sässeli go,
doch das Sässeli het ne de ned lo go.
Jetzt chont s' Bescht, das esch kei Log,
ighänkt het er met em Schi-Azog.
Om d'Omlänkroue richtig Tau esch es gange,
ond am Sässeli tuet de Petu hange.
Mer gänd der jetz no e guete Rot,
Schifahre jo, aber doch ned no so spot.

**Tuet die do ned Sponsore uslade?
Mou die do tuet Sponsore uslade!**

25-Johr Reitclub, dä het em August gross jubiliert,
sogar e Reiterpredigt häig me no zelebriert.
Am Fescht het me ou die Ehemalige ond d'Gönner ned vergässe,
för zwänzg Stotz besch Sponsor, ond scho chasch met Ahang go frässe.
Aber chum händ die Lüüt de d'Iladig i de Hand,
werd de Aeschlima Esther e Drockfähler bekannt.
Be de Chli-Sponsore sött me oni Begleitig cho,
sösch treit de Club jo es Defizit dervo.
So mues halt d'Esthe schriebe, s'esch gar ned populär,
zom Mettagässe nor 1 Person, das seia reulär.